



吳興掌故集

ル 5
2482
1



門儿呂5
號 2482
卷 1-6

品與厚故
鐘十七齋

吳興鑑

嘉	吳
業	興
堂	劉
刊	氏

吳興掌故集敘

予友徐君伯臣遊於吳興愛其俗朴儉而淳因結廬九霞山居焉頃作掌故集若干卷寄予大都采拾湖誌所遺在正史諸子集可稽證郡邑事者錄存之如漢人載籍功令悉屬之文學掌故云至論水利田賦利病所繇并與除大要輒附己意見言亶亶獨詳予蓋凋然悲傷其志焉徐君少有奇抱固欲起而建功名以顯於世乃其時命鬱塞久之弗克振晚就一縣令亦竟不合棄去今老矣先是徐君尊公歿卜葬吳興今其言曰先子抔土所存吾無呂補助湖人獨紀事日取閱之嗟乎徐君不能忘湖人詎能忘斯世哉君子遇時而興於位可

以深長思矣予以爲是集有可裨湖政者迺爲之題其簡端嘉靖庚申歲淞江督學使吳郡范唯一譔

重訂吳興掌故集序

余繙閱之餘嘗取事關吳興者手錄成帙旣得長谷先生所刻掌故集賞其先獲我心會從兄彥先躬爲校讐索余作序蓋余三復斯集至風土記而歎人代遞降如江河日趨於下也吳興風俗往最近古以樸其士人雅稱率素闊達而峭直猶有先民典刑其里閭力本重穡終歲勤動唯斤斤以儉勤著子孫無敢傲康以墮先業自樸一散而習於煩貌潤言甘輒美少骨因是繁縟其節文綢繆其款接命曰周委而俗始趨佻矣迨樸又散

而習於夸鼎食綺衣競相擅倣空齊民之蓋藏以矜迨逐自謂未能免俗而俗始趨汰矣迨樸又散而習於媮曠業惰農游閒陸博幾市與野爭民徵貴者走死地如鶩轉嗤昔人無知而俗始趨蕩矣迨樸又散而習於澆目詡眉語狙巧鬪捷正直爲戇清修爲拙譎浪槩於尊親機關騁於肉骨而俗流失世敗壞濫觴將何底止蓋先生松產僑寓吳興每津津此中風土獨收其樸謂勝松遠甚今相距特數紀此中之樸百不存一似翻與松相習卽先生又能如之何語云已離已琢還返於樸善返樸者常塞其翹然自張之溢情而獨尋穆然渾噩之初意端在坦夷用在儉嗇本在力農道在敦厚其轉移

係莅斯土者而共砥風靡士大夫與有責焉余觀先生
命篇首以宦業而卽次以鄉賢噫命之矣萬厯乙卯夏
日澹樸居士茅瑞徵伯符書

燕山李松頓首再拜奉書

長谷先生足下比日讀

公所撰吳興掌故采摭亡佚補綴漏遺整齊故事足備
考鏡詳矣備矣至水利一帙尤有功於蘇常松秀數州
奚啻吳興而已也蓋今上流天目諸山洪水時發加積
陰恆雨連數月不休則疏濬之功全在吳下顧雖嘗置
水利一道然止轄浙不及吳則必動多掣肘故今誠有
意斯民爲國家計久遠請改敕鹺法察院留上供錢穀
數十萬募民及給沿湖若浦田戶食考古宜今務成永
利期三年事竟乃得代轉勿爲浮言勢力所撓奪著在
令甲以爲常庶幾察史奉朝令以專行臬臣假臺力而

其濟

公意以謂如何竊睹野記載元至正開張七誠嘗下是州僭改元而以其壻潘元明爲右丞鎮之其後王師攻之弗克至用奇兵由湖大錢港毘山谿入郡城元明被執伏誅如此則前港若谿之關繫湖郡利害不細矣不知可因以設險控扼如古浮梁橫絕之制否或者別有津要可講求而豫待者乎今雀鼠輩所在而是湖尤藪窟出沒無時弗易譏察試與守若令之哲且達者商而廣焉是亦或一道矣簿牒叢委語不成倫唯明公裁而教之幸甚幸甚

吳興掌故集引

余自嘉靖丁亥遊於吳興樂其土風晏然安之也爲作掌故集自正史至稗子諸書與舊錄所具或至放失及余膚臆之見凡可備誌家之采拾者咸錄焉吳興在澤國上游其俗素樸厚絕無技巧淫靡之習自漢以來流寓及宋南渡諸賢類多居此蓋有自也夫其本俗儉嗇加以君子之遺風故至於今以尙禮節稱焉顧余以筆劄之役自效其私而衰遲湫薄實多慙負聊附於野史之家而已山空日永灌園采藥之暇以其成錄對之几案千數百年故實一舉目可盡則固山家一種樂事也因序而藏焉雲閒徐獻忠識

徐印朱
獻忠文

九霞白
山人文

風土 一卷

物產 一卷

雜攷 四卷

掌故集目錄

吳興掌故集卷之一

吳興先哲遺書

九靈山長徐獻忠輯

延州布衣吳夢暘閱

後學茅獻徵校

宦業類

吳興自昔為名郡邑賢者樂遊其地自魏晉以後仕者或志慕閒散往往請乞於此志載不深攷索或僅列名職而政行不及或併其名不載蓋自吳萬彧而下四十有二人焉予所聞見尙有關略仍不能無望於博雅君子云

吳萬彧為烏程令與孫皓相善時國內欲立長君彧遂

稱皓才識明斷是長沙桓王之儔又加之好學奉遵
法度屢言之於丞相濮陽興及左將軍張布立之皓
立後以或爲丞相

吳孫河爲烏程長邑人吳粲爲小吏河深奇之後河爲
將軍得自選長吏因表粲爲曲阿丞

陸璣爲吳太子中庶子任烏程令嘗撰毛詩草木鳥獸

蟲魚疏二卷

見崇文
總目

館閣書目載璣字元恪吳郡人其書但附詩釋義窘
於采拾似非通儒

晉張茂會稽人爲吳興太守值王敦問鼎執正不移敦
遣沈充攻城殺之先是茂夢大象以問萬推推曰君

當以大郡而不能善夫象者大獸獸者守也象必以

齒焚其身

出異苑

茂妻陸氏吳郡人茂旣被害陸氏念恨乃傾家資率
茂部曲爲先登以討充充敗乃詣闕上書謝茂不克
之責詔褒茂夫妻忠烈並加封爵

出本傳

晉庾桓爲吳興太守先是孫恩寇陷會稽吳興人王虺
與胡桀部驃共殺吳興太守謝邁以郡應恩謝珍高
素討斬之并誅恩所署餘姚令郡人沈穆夫四年恩
再陷會稽殺謝珍時庾桓繼守吳興恐郡民復從亂
殺男女數千人以安之

晉許裴字季顯嘗爲烏程令

見世說新語方正篇許侍中注

宋王靈鞠烏程人曾任烏程令

見第二卷鄉賢類

宋虞玩之字茂瑤會稽餘姚人少閒刀筆汎涉書史仕為烏程令路太后外親朱仁彌犯罪玩之依法按正太后怨訴孝武坐免官

宋周嶠汝南人任吳興太守

元嘉中吳興人卜天與為左細仗主廣威將軍死於元凶劭之難郡人沈慶之佐武陵王駿討劭誅之先是劭加嶠為冠軍將軍時王誕起兵會稽檄至吳興嶠回惑不知所從府司馬王珍孫殺之舉郡應誕宋郗顯泰始中為吳興太守時孝子錢延慶為父報讐

殺人自繫獄願表於朝不加罪

宋王琨為吳興太守因濮陽吳慶之有志節欲以為功曹答曰走無人性情直以明府見接以禮所以奔走歲時若欲見吏是畜魚於樹棲鳥於泉耳不辭而退琨追謝之望塵不及矣

宋沈文秀為吳興太守

蒼梧王元徽四年蕭道成輔政沈攸之舉兵荊州時沈慶之之子文宿守吳興攸之宗族殺之以報慶之之怨

江秉之字玄叔濟陽考城人宋少帝時為烏程令以善政著名東土撰文釋傳於世

齊江福字弘業濟陽考城人少爲明帝所親恩如兄弟
明帝爲吳興守以福爲郡丞
齊正寂之仕故鄣縣令

寂之字惠立烏程人年十七爲州西曹兼直主簿刺
史王彧行夜還前驅已至而寂之不肯開門曰不奉
墨旨彧方於車中爲教然後開彧歎曰不意郅君章
近在閣下卽轉爲主簿後在故鄣專以廉潔御下於
時丹徒令沈嶺之以清廉抵罪寂之聞之曰清吏眞
不可爲也政當在季孟之間

王彧爲吳興刺史

見前正寂
之條內

齊袁彖永明中爲吳興太守御史中丞沈深彈去之後

至建武中彖從弟□爲中丞到官數日奏彈深子績
父在蹴白幘車免官禁錮

梁何敬叔爲長城令平居以廉稱忽榜門受餉得米二
千斛他物稱是人多譏之有頃悉以貸貧民輸負租
斗米尺帛皆不留

此一
條已見志

梁褚澧字士洋由曲阿令歷晉安王中錄事正員郎烏
程令兄游亡卽棄縣還爲太尉屬澧之爲縣清慎可
紀好學解音律重賓客
梁到仲舉字德言到彥之之孫洽之子也仕爲長城令
政號廉平陳文帝居鄉里嘗詣仲舉時天陰雨仲舉
獨坐齋內聞城外有簫鼓聲俄而帝至仲舉異之乃

深自結帝又嘗飲夜宿仲舉帳中忽有神光五采照於室內由是祇事益恭及侯景平文帝爲吳興太守以仲舉爲郡丞與潁川庾持俱爲帝賓客

庾持字元德少孤性至孝篤志好學仕爲尙書左戶郎陳文帝守吳興以爲郡丞

陳陰鏗仕故鄣縣令

鏗罷故鄣詩見藝文上故鄣只今安吉孝豐地吳王昔采銅於鄣山

周文郁仕吳興太守其子寶安重拜吳興太守

文郁字景德陽羨人以材武事陳武帝盪寇除凶其功居多及破徐嗣徽蕭勃功成授開府儀同三司歸

除吳興太守寶仁字安仁折節讀書馭文郁士卒甚有威惠文帝深器重之及平王琳有功重拜吳興太守襲封壽昌縣公子名碧嗣

唐余蟾丹陽人任烏程令

見弘農楊夔所撰烏程修建廡字記

許鏞高陽人爲湖州錄事參軍

見楊夔錄事參軍新廳記

陸龜蒙

張搏俱仕爲吳興郡丞李蔚盧攜景重之志以張搏列在太守或自郡丞遷授也

顧道衍字正平野王之孫開元中舉進士又登文學優

瞻科仕爲湖州司功參軍廉平惠愛獄簡訟息民稱
焉後棄官歸吳築室奉母年七十卒

崔孚博陵人天寶末由越州餘姚令改湖州長城令長
城之里又加於前政成秩滿解印罷去優游自得獨
善其身興元元年疾沒於宋

見白居易博陵
崔府君神道碑

張宣唐寶曆中自越府戶曹掾調授安吉令

前定錄云宣以家在浙東意求蕭山出謁前夢一女
子年二十餘曰妾有十一口聞明府將至故來拜謁
後得安吉令乃知陰騭已定及秩滿將選又夢前女
子曰明府又當宰妾之邑然家屬止三口爲累耳及
唱官乃得臨安令三口臨字也其前定如此

楊華任烏程令僧皎然有酬烏程楊明府華雨後小亭

對月見呈詩

夜涼喜無訟霽色搖閒情暑退不因雨陶家風自清
凝絃停片景發詠淨秋聲何事禪中隱詩題忽記名
李洪仕爲湖州長史皎然有奉酬李中丞洪西亭卽事
見寄兼呈吳馮處士時中丞量移湖州長史一首云
愛君谿上住遲月開前扁山火照書卷野風吹酒瓶
爲誰留此物意在眼中青樵子逗煙墅漁翁宿沙汀
主人非楚客莫漫譏獨醒宿昔邢城功道高心已冥
貪將到處士放醉烏家亭

李萼任湖州防禦副使

大庾七年顏魯公刺湖州辟富陽丞李萼為湖州防

禦副使

權器任湖州判官

先任校書郎

楊昱任湖州判官

先任大理司直

二人俱為顏魯公所辟公之刺湖以墾草闢田之務委之李萼其閱簿檢吏接詞政之務委之器昱等而境內晏然

宋蔣靜釋褐調長興尉獲盜數十人悉貸遣之曰吾不利汝以希賞汝亦無得為盜盜感泣後皆為良民左文質景德七年攝湖州長史嘗著吳興統記十卷王堯臣天聖五年舉進士第一為將作監丞通判湖州

元曾遇字心傳華亭人宋丞相魯公公亮之裔博學敏文詞尤攻書學元時以薦授湖州路安吉縣丞致仕與王昭大詹潤徐順孫齊稱為雲間四俊
元趙廷芝華亭人第進士調歸安縣丞元世南人登進士自廷芝始

趙與詹蘭谿人宋湖州府通判其弟與嘗侍在湖遂繼希永後任浙西安撫使生子孟頫字子昂
已上四十有一人新舊志俱不曾錄其名職其名雖具而政行不詳者附錄於後
晉陸納字祖言少有清操為吳興太守時至姑熟辭桓公因問桓曰公致醉可飲幾酒食肉多少桓言年大

來飲三升便醉白肉不過十臠卿復云何祖言曰素不能飲止可二升肉亦不足言後伺桓閒日白云外有微禮方守遠郡欲與公一醉以展下情桓欣然納之時王坦之桓彝在坐見所進惟酒一斗鹿肉一柸皆愕然祖言徐曰明公云飲三升納可二升今有一斗以備杯酌餘瀝桓公諸人並歎其率素敕中廚更設精饌極歡而罷

納守吳興時衛將軍謝安嘗欲詣納納兄子俶怪納無所備乃私蓄數十人饌安既至納所設惟茶果而已俶遂陳盛饌珍羞畢具及安去納杖俶四十二云汝既不能光益叔父柰何穢我素業

懷帝永嘉四年義興人錢璿反周玘討平之玘乃飭之孫處之子也三定江南瑯琊王睿以玘爲吳興太守於其鄉立義興郡以旌之割陽羨及長城之西鄉屬之

愍帝建興元年周玘卒子勰使吳興功曹徐馥殺吳興太守袁琇尋討平之左丞相睿以玘弟札爲吳興太守

周札守吳興時惠帝第四女臨海公主羊皇后所生初封清河公主未出適值亂掠賣長城民錢温温以送女女遇主甚酷主自告太守周札以聞於是殺温及女以適譙國曹統

晉成帝咸和二年蘇峻據溧陽反詔以吳興太守虞潭督三吳等郡諸軍事峻陷建康潭舉郡兵同吳興內史蔡謨前義興太守顧眾等討峻潭母孫氏戒之曰吾聞忠臣出孝子之門爾當舍生取義勿以吾老爲累乃盡發家僮以助戰質所服環帶以給軍資賊平朝廷知其憂國忠誠拜武昌侯太夫人加金章紫綬安帝隆安元年司徒左長史王廞使前吳國內史虞嘯父入吳興義興募兵以討王國寶赴者萬計國寶死廞謀以其眾討王恭兵敗廞走死收嘯父下廷尉以其祖潭有功免爲庶人

晉謝邁爲吳興太守孫恩寇會稽東土諸郡響應吳興人胡桀郗驃等破東遷縣邁姪方明勸邁避之不從賊至遇害

王子敬爲吳興羊欣父不疑爲烏程令欣時年十五六書已有意爲子敬子敬往縣入欣齋欣著新白絹裙晝寢子敬乃書其裙幅及帶皆盡欣覺遂寶之後以上朝廷

宋元嘉中謝述爲吳興太守時帝弟司徒義康坐事歎曰昔謝述惟勸吾退劉班惟勸吾進今班存而述死宜其及也

宋泰始二年吳興太守王曇生舉兵應潯陽臺遣吳喜討之卽克義興時都水使者孔瓌屯吳興南亭曇生

見燥計事燥大懼墮狀曰臺官所構惟我而已不亟

去將為所獲即與曇生奔會稽東軍遂敗

宋褚淵字彥回尚宋文帝女餘姚公主拜駙馬都尉元

徽二年以散騎常侍丹陽尹出為吳興太守

史誌止稱褚彥回而不著其名為唐高祖諱也

王仲實作彥回碑有云丹陽京輔遠近攸則吳興襟

帶實惟股肱頻作二守並加蟬冕政以禮成民是以

息

謝朓字敬冲孝武初求出為吳興太守至郡置數斛酒

寄其弟吏部尚書瀹曰可力飲此勿預人事朓尋棄

官去

南史載朓為吳興時以雞卵賦人收雞數千遁節不

全為清談所少豈以時事不可為故自汗以免耶

王僧虔為吳興時以工書見稱人以羲之前為吳興而

僧虔足繼其後然當時孝武欲擅書名虔不敢自顯

於大明閒常用掘筆書以此見容

齊武帝永明六年吳興饑西陵戍主杜元懿乞領攝西

陵牛埭并浦陽南北津柳浦四埭歲可增稅額四百

萬會稽行事顧憲以為吳興之民連歲失稔封土從

豐良田饑棘元懿幸災邀利事不可行乃止

齊謝覽與王茂遠約官至侍中不復更謀仕進後覽自

吏部尚書出為吳興平生不畏強禦由處俗情薄也

茂遠爲侍中後亦澹然自守吳興縣山陰人謝覽出爲吳興時中書舍人黃睦之家居烏程子弟專橫前守皆折節事之覽將到郡睦之弟迎覽覽逐去其船杖吏爲通者自是睦之家杜門不出郡境多劫爲東道患覽下車肅然初齊明帝及覽父瀾及東海徐孝嗣並爲吳興名守覽皆過之昔在新安頗聚斂至是遂稱廉潔時方之王述云

齊王秀之字伯奮祖父敬弘性真正不與權貴往來及致仕卽隱居吳興之舍亭山秀之爲諸王長史時行事便歎曰仲祖之識已於已多便無復仕進止營理舍亭山宅有終焉之志及除守吳興郡隱業所在心

願爲之到郡修舊山移置輜重

按敬弘本傳舍亭山屬餘杭是時屬吳興

統內卽今德清之市亭山也

齊張稷字公香爲吳興太守下車存問遺老引其子孫置之右職政稱寬恕初去郡就僕射徵道由吳鄉人候稷者滿水陸稷單裝逕還都下人莫之識其率素如此

齊王敬則臨淮射陽人以都官尙書遷吳興太守郡多標剝有數歲小兒於路取遺物敬則殺之以徇自之路不拾遺又錄得一偷召其親屬於前鞭之令偷常掃街路久之乃令舉舊偷自代諸偷恐爲所識皆逃去境內以清敬則少時屠販於湖至是入烏程市見

屠肉枿歎曰吳興昔無此枿是我少時作也乃召故人飲酒說平生殊不自屑

梁王騫字思寂梁祖於鍾山造大愛敬寺思寂有別墅在寺側良田八十餘頃是王丞相賜田高祖遣主書宣旨就思寂求市以賜寺思寂答旨云此田不賣若是敕取所不敢言高祖怒付市評價以直逼還之由是出爲吳興太守

張纘字伯纘范陽方城人梁大通中爲吳興太守居郡省煩苛務清靜人吏便之後徵爲吏部尙書其子范岫字林賓濟陽考城人學問該博進止以禮居官恆以廉潔著稱爲長城令有梓材巾箱經數十年經貴

遂不改易在晉陵惟作牙管筆一雙猶以爲費所著文集禮論雜儀字訓行於世

袁昂爲吳興太守梁武初起獨拒境不受命梁使駕部郎江革遺書曰根本旣傾枝葉安附今竭力昏主未足爲忠家門屠滅非所謂孝豈若翻然改圖自招多福昂復書曰三吳內地非用兵之所況以偏隅一郡何能爲從自承麾旆屈止莫不膝袒軍門惟僕一人敢後至者政以內揆庸素文武無施雖欲獻心不增大師之勇置其愚默寧阻眾軍之威幸藉將軍舍引之大可得從容以禮竊以一食微施尙復投殞況食人之祿而頓忘一旦非惟物議不可亦恐明公鄙之

所以躊躕未遑薦璧昂門時事於武至今北地傳映
曰昔元嘉之末開闢未有故太尉殺身以明節司徒
當寄託之重理無苟全所以不顧夷險以徇名義今
嗣王昏虐曾無悛改荆雍協舉上流天人之意可知
願明府深慮無取後悔後建康平定梁使豫州刺史
李元禮巡撫東土敕元禮曰袁昂道素之門世有忠
節天下須共容之勿以兵威臨辱元禮至吳興宣旨
昂亦不請降但開門撤備而已後徵昂至都使與豫
州刺史馬仙琕同入曰令天下見二義士
張嶷字四山由太府卿爲吳興太守侯景圍建業遣弟
伊率兵赴援城陷景遣行臺劉神茂攻破義興遣使

說嶷斬其使仍遣軍破神茂侯景乃遣其中軍侯
子鑿助神茂擊嶷軍敗乃釋戎服坐於廳事賊臨以
刃終不屈執以送景將捨之嶷曰死爲幸乃殺之子
弟遇害者十餘人景欲存其一子嶷曰吾一門已在
鬼錄不向爾處求恩於是皆死

梁吳興太守杜龕王僧辨之婿也僧辨攻吳興爲震州
以龕爲刺史龕恃僧辨之勢素以法繩陳霸先之宗
族及霸先殺僧辨使兄子禧還長城立柵以備龕龕
遣兵攻禧不克已而吳郡義興相繼降霸先陳禧周
文育合兵攻龕於吳興龕將杜泰與禧通勸龕出降
龕妻王氏曰仇隙如此何以降爲因出私財募士擊

雪集一
蒨等大破之龕勇而無謀嗜酒常醉杜泰開門納陳
兵龕尙未醒蒨使人負至項王廟前斬之
唐咸通末湖州牧趙濛李超相次俱狀元及第而鄭渾
之爲蘇州錄事談銖爲醴院官鍾輻爲院巡俱廣文
二郡土地相接時爲語曰湖接兩頭蘇聯三尾
崔元亮與元微之白樂天皆貞元初同年生也元亮名
最後自詠云人閒不會雲閒事應笑蓬萊最後仙後
白刺杭州元刺越而崔刺湖州白以詩戲之云越國
封疆吞碧海杭城樓閣入青天吳興最小君應屈爲
是蓬萊最後仙

獨孤問俗爲湖州刺史時寇亂攻陷州縣使將軍辛敬

順於金鵝山築城以守亂平兵曹參軍慶澄兼武康
德清二縣令復築武康城於餘英谿北上元四年間
俗重濬郡城之濠

李師悅之守吳興也廣明中黃巢倡亂犯闕翠華有西
南之幸梁鄭周秦之甲閣手無敵甲辰年師悅以彭
門之師捨巢於萊蕪傳首成都明年春帝始還宮悅
遂以工部尙書守吳興後帝念其功詔加防禦使始
開幕延賓增吏拓制度以節鎮行事於是召烏程令
余蟾於閒散拔錄事參軍許鑄於曹掾後薨於郡治
湖州刺史高彥

唐昭宗時李師悅子李彥徽奔淮南錢鏐取湖州天

復二年杭州將徐綰許再思作亂湖州刺史高彥遣
子渭將兵入援死於靈隱綰後奔田頔楊行密破頔
獲綰檻車送之錢鏐鏐剖其心以祭高渭
昭宣帝天祐三年高彥卒子灋代爲湖州刺史灋性凶
忍嘗與州吏謀曰吾欲盡殺百姓何如吏曰如此租
賦何從出當擇可殺者殺之耳時灋糾民爲兵有言
其怨咨者灋悉集民兵於開元寺前給云犒享入則
殺之死者逾半在外者覺之縱火作亂乃閉門大索
凡殺三千人吳越王欲誅之灋以州畔附於淮南舉
兵焚義和臨平鎮鏐命指揮使錢鏐討之湖州將盛
師友沈行思閉門拒灋灋奔淮南三月吳越王巡湖

州以鏐爲刺史留行思爲巡檢使與師友俱歸錢塘
行思謂同列陳瓌曰王若以師友爲刺史何以處我
時瓌已得鏐密旨遣行思詣府乃給之曰何不自詣
王所論之行思詣錢塘數日瓌遣其家亦至行思恨
瓌賣已會鏐白衣錦歸將謁行思取鍛鎚擊瓌殺之
因詣鏐所與師友論功奪槩欲刺思友鏐斬行思以
師友爲婺州刺史
宋滕元發光祿受知神宗以議政與荆公不合遂出爲
帥又以妻黨李逢事謫知池安許見至國門又中飛
語謫知筠州是時艤舟國東普照寺陳表自辯神宗
大悅以公知湖州乃公所乞也是時林子中作禮部

員外郎與公婿何洵直邦美同曹聞公得湖以詩賀
日清風樓下兩谿春三十餘年一夢新欲識玉皇香
案吏水晶宮裏謫仙人蓋公初第卽倅湖州距是三
十年矣
蘇子瞻守湖州謝表云魚鳥之性旣自得於江湖吳越
之人亦安臣之教令又云知其愚不識時難以追陪
新進察其老不生事或能牧養小民表進言者以爲
謗在任甫三月中使皇甫遵到湖追攝赴獄一子稍
長徒步相隨其餘守舍皆婦女幼穉至宿州御史符
下取書於家州郡望風遣吏發卒圍船搜取老幼幾
怖死婦女恚曰是好著書書成何所得而怖我如此

悉取焚之

蘇子瞻知湖州建陽陳師錫掌書記軾下御史獄師錫
篤朋友之義安輯其家後子瞻入西掖薦以自代明
著其事仕至殿中侍御史
胡宿知湖州前守滕公適當安定先生教授乃大興學
校費錢數萬未訖工而公去羣小沸然謗公用錢有
不明者自通判以下不肯書其籍胡公於坐折之曰
君佐滕侯幾時矣假滕公之謀有不臧何不早告乃
陰拱以觀其去而非之豈古人分謗之意一坐大慙
爲公書籍

余端禮字處恭孝宗時知烏程決事風生庭寂如水台

湖嚴三州有口算錢曰丁絹臨安之民口算錢曰身
丁民不能堪公請與復三年

錢顛字安道無錫人熙寧閒由烏程令召爲御史裏行
王安石初行新法上疏論安石歷官以來莫不曰尊
尙堯舜遂致公輔今乃首以財利之說言行乖戾剛
狠自任曾公亮位居丞弼被遇三朝反有畏避安石
之心更相稱譽以固榮寵安石大怒貶監衢州鹽稅
覬行謂御史孫昌齡曰君奴事安石以得御史亦當
少念報國君爲美官自以爲得策卽我視君犬彘不
若也時人號爲鐵肝御史卽是而觀烏程之政可測
矣

陳之茂紹興閒守湖州因民間丁絹太重因請折絹以
五千錢爲一匹仍止歲額爲定不以添丁而增賦詔
可其奏自是湖州以五丁科絹一匹嗣後余端禮仍
乞七丁始科絹一匹

韓季宣字士龍乾道八年知湖州時張南軒與書云論
及學校之事此爲政之所當先也湖學安定先生經
始當時作成人亦可謂盛矣聞欲招陳君舉來學
中此固善但欲因程文而誘之讀書則義未正今日
一種士子將先覺言語耳剽口誦用爲進取之資轉
趨於薄此極害事若曰於程文之外明義利之分教
導涵養使漸知趨向則善也

又一書云吳興下車寢久學道愛人之志亦可少施
否某每念時事若此良由士大夫鮮克務學之故蓋
天理之微爲難存氣習之偏爲難矯譬諸射者在此
有秋毫之未盡則於彼有尺尋之差矣自惟不敏惕
然夙夜不敢遑暇思得良友相切磨以庶幾乎萬一
其願見之心誠非可以言喻也

楊長孺伯子嘉定閒守湖州彈壓豪貴牧養小民治聲
赫然冠蓋之士相與肖像祠於學宮與工部尙書戴
少望並列伯子意不悅會除浙東提舉將行辭先聖
禮畢坐講堂命取所祠像題云面有憂民色天知報
國心三年風雨兩鬢雪霜深更莫留行迹何曾廢

古今不如隨我去相伴老山林遂卷而行當時士子
有戲和其詩者末云可憐戴工部獨樹不成林
伯子乃誠齋長子故名長孺守吳興時母夫人羅氏
於郡齋種苧躬緝爲衣時年八十餘矣楊公分月俸
以奉之夫人忽小疾後出所積券曰此長物也今宜
悉以謝醫則吾無事矣

元虞志道字彥高無錫人以茂異起爲校官其學務在
明體適用文章必本于理教授湖學受知于趙承旨
踐履篤實後學師尊之所著有雲陽集

見毘陵
人物志

宋蔣良貴簽判安吉州時水災後修城郡守趙希觀屬
良貴作記內用浩浩字希觀因時相史彌遠父諱浩

欲改之良貴不可日以宗室而避宰相父名此非藝
祖皇帝所望於金支玉葉也聞者壯之

吳興掌故集卷之一

...

吳興掌故集卷之二

...

九靈山長徐獻忠輯

延州布衣吳夢暘閱王

後學茅獻徵校

鄉賢類

自昔載籍所傳類多華耀之士然猶有檢拾不詳者
焉至於伏藏原野晦蹟關柝雖有卓行殊賢其腐沒
蓋多矣予覽吳志亦不能無憾於斯故所采錄頗著
云

漢費汎

仕為梁相
烏程人

費鳳字伯簫汎之長子初舉孝廉拜郎中除陳國新

平長宰司舉其才賢乃讓其弟而退身還鄉其後故
鄆不靖命君試守即討平之轉堂邑令年六十六而
沒其弟仕為九江太守早卒又以腴田讓與弟之子
行義高卓詳見卜胤石勳誅辭之碑一子亦早卒遺
孫字元宰

吳徐詳字子明烏程人陳壽評曰是儀徐詳胡綜皆孫
權時幹興事業者也儀清確貞素詳數通使命綜文
采才用各見信任辟之廣廈其榱椽之佐乎

聞人夤吳興人晉孝武太元十二年上疏攻會稽王道
子嬖人趙牙帝由是疏道子

晉吳達烏程人性至孝友值饑年而疫父母兄嫂及羣

從幼小十有三人皆卒達在病鄰里咸以葦裹而埋
之達夫妻幸存晝則傭賃夜還燒甄伐木期年成七
墓葬十三棺達夜行遇虎虎輒避之太守張崇之義
其行加羔鴈之禮命補工曹吏以門寒固辭不就後
舉孝廉太守王韶之有贈詩見文史類

沈道虔武康人少好老易居縣北石山下孫恩亂後饑
荒縣令庾肅之迎出縣南廢頭里為立宅臨谿有山
水之玩時復還石山精廬與諸兄子共釜庾之資困
不改節郡府凡十二命皆不就有入竊其園菜外還
見之乃自逃隱待竊者去乃出鄉里少年相率受學
貧無食立學徒武康令孔欣之厚相資給學者咸得

有成宋文帝聞之遣使存問賜錢三萬米三百斛悉
供孤兄子嫁娶徵員外散騎常侍不就
宋王靈鞠烏程人少好學善屬文曾爲烏程令不得志
泰始初坐事禁錮太守褚彥回謂人曰此郡才士惟
王靈鞠及沈勃耳乃赦之明帝除太尉參軍
沈麟士字雲楨祖英期晉太中大夫父虔之宋樂安令
麟士幼俊敏七歲聽叔父岳言玄賓散言無所遺岳
拊其背曰斯文不墜其在爾乎張永爲吳興守請麟
士入郡沈聞郡後有佳山水乃往停數月張欲請爲
功曹使人致意沈曰明府德履冲素留心山谷民是
以被褐負文忘其疲倦必欲飾混沌以娥眉冠越客

以文冕走雖不敏請附高節有蹈東海而死耳

宋錢延慶烏程人泰始元年其父錢仲期爲吳慶恩所
殺時延慶屬役在都聞之馳還於庾浦埭逢慶恩手
刃殺之自繫烏程獄吳興太守郗願表不加罪許之
宋羊緝之烏程人女名佩絰隨母還舅氏母亡晝夜號
哭不飲食三日而亡鄉里號爲女表
邵玄之吳興之東遷人能傳五經文句宋時顧歡吳郡
之鹽官人從之受業

宋王景賓字彥先吳興人以節義聞父康祖任無錫令
亡後僮僕數十人及宅宇畜產悉讓與兄震之震之
推齋屋三間亦不肯受太守孔山士歎曰聞柳下惠

之風貪夫廉懦夫有立志復見之矣後終於奉朝請
沈僧昭字法朗少事天師道士常以甲子甲午日夜著
黃冠醮於私室時說人吉凶頗有應驗自云爲太山
錄事幽司有所收錄必僧昭署名中年爲山陰縣梁
武陵王紀爲會稽太守宴坐池亭蛙鳴聒耳王曰殊
廢絲竹之聽僧昭咒厭十許口便息及日晚王又曰
欲其復鳴昭曰王歡已闕今恣汝鳴即便喧聒又嘗
校獵中道而還左右問其故答曰國邊有事須還處
分問何以知之曰向聞南山虎嘯知耳俄而使至復
謂人曰吾昔爲幽司所使實爲煩碎今已自解乃開
匣出黃紙書上有一大字字不可識曰教分判如此

及太清初謂親知曰明年海內喪亂生靈十不存一
乃苦求東歸旣不獲許及亂百口皆殲位止廷尉卿
聞人負吳興人齊高帝時年十七歲結客報父仇爲帝
所賞位至長水校尉
齊正雄烏程人父冠先永明中使蠕蠕不屈節而死武
帝以其不辱命以錢一萬布三十匹賜雄雄不受上
書曰臣父執節如蘇武守死如谷吉遂不書之良史
甄之褒策萬代之後誰死社稷建元四年車僧朗銜
使不異抗節是同詔贈正員外郎此天朝舊事臣父
成例也今僧朗返葬冢塋臣父堙棄絕域語忠烈則
正亦不謝車論茶苦則彼優而此劇名位不殊禮數宜

等乞申哀贈書奏不省

孟景翼吳興人好老氏道齊惠文太子召入玄圃眾僧大會竟陵王子良使景翼禮佛翼不肯造正一論大略曰寶積云佛以一音廣說法老子云聖人抱一以爲天下式一之爲妙空玄絕於有境神化贍於無窮爲萬物而無爲處一數而有數莫之能名強號爲一在佛曰寶相在道曰玄牝道之大象卽佛之法身以不守之守守法身以不執之執執大象俾物有八萬四千行說有八萬四千法法乃至於無數行亦達於無央等級隨緣須導歸一

齊太子詹事張緒領揚州大中正長沙王冕薦用吳興

聞人邕爲州議官緒正色曰此是身家州鄉殿下何得見逼

齊王仲孚烏程人大司馬王敬則反於會稽兵逼京師仲孚時爲曲阿令敬則前鋒奄至仲孚謂吏民曰賊雖乘勝氣銳而烏合易離若收船艦決長岡埭瀉瀆水以阻其路得留數日臺軍必至則大事濟矣敬則值涸瀆果不得進兵敗而死

王仲孚爲山陰令甚有聲稱百姓謠曰二傅沈劉不如一王蓋前世傅琰父子沈憲劉玄相繼宰山陰並有政蹟仲孚皆過之也

王令楷吳興人善詩與齊蕭文琰濟陽江洪餘姚虞羲

其打銅鉢響滅卽詩成皆可觀竟陵王子良甚稱焉
吳規吳興人頗有才學邵陵王綸引爲賓客深相禮遇
及綸作牧郢蕃規從江夏遇張纘出之湘鎮路經郢
綸餞之南浦纘見規在坐意不能平忽舉杯曰吳規
此酒慶汝得陪今宴規尋起還其子翁孺見父不悅
問而知之翁孺因氣結爾夜便卒規恨纘慟兒忿哭
兼至信宿之間又致殞規妻深痛夫子翌日又亡時
謂張纘一杯酒殺吳氏三人其輕傲皆此類竟不得
其死

沈炯字初明武康人梁元帝徵爲給事黃門侍郎時尙
在王僧辯幕下魏克荊州被虜甚見禮遇以母在東
恆思歸國爲表奏之曰臣聞橋山雖掩鼎湖之寵可
祠有魯就荒大庭之迹無民伏惟陛下降德滌蘭纂
靈豐谷蕙道旣登神仙可望射之采于海浦禮日觀
而稱功橫中流于汾河指柏梁而高宴何其甚樂豈
不然歟旣而運屬上仙道窮晏駕甲帳珠簾一朝零
落茂陵玉盃遂出人閒凌雲故基與原田而撫膺別
風餘跡帶陵阜而茫茫羈旅縲臣豈不落淚昔承明
見厭嚴助東歸駟馬可乘長卿西返恭聞故實竊有
愚心黍稷非馨敢望徼福但雀臺之弔空悵魏君雍
丘之祠未光夏后瞻仰煙霞伏增淒戀奏後遂獲東
歸

梁正遲字希範靈鞠之子也黃門郎謝超宗徵士何點
並見異之武帝引爲驃騎主簿出爲永嘉太守至任
下教曰貴郡控帶山海利兼水陸實東南之飮壤一
都之巨會而曝背煦牛屢空于畎晦績麻治絲無聞
于室巷其有耕灌不修桑榆靡樹遨遊塵里酣脯卒
歲什伍乖鄰流宕忘返才異相如而四壁徒立高慙
伸蔚而三徑沒人是非盛世之民名都之俗革其習
故務其本業維新化理安育老穉雖謝文翁之正俗
庶幾龔遂之遺風

朱文濟字敬達吳興人自賣以葬母太守謝瀹命爲儒
林不就

姚僧垣字法衛武康人吳太常信之八世孫也父菩提
梁高平令留心醫藥僧垣幼通洽仕梁爲太醫正武
帝嘗因發熱服大黃僧垣曰大黃快藥至尊年高不
宜輕用帝弗從遂至危殆元帝有腹心疾諸用平藥
僧垣曰脈洪實宜用大黃進湯果下宿食而愈金州
刺史伊婁穆病自腰至臍似有三縛兩腳緩縱不復
自持卽爲處湯三劑初服卽上縛解以次盡除卽爲
合散一劑兩腳疼痺復緩曰霜降此患當愈旣而果
然後仕至驃騎大將軍開府儀同三司封長壽縣公
爲集驗方十二卷長子察南史有傳次子最

沈德威字懷遠吳興人少有操行梁太清末遁於天目

山築室以居雖處亂離篤學無倦天嘉元年徵爲國
子助教每自學還私室講授道俗受業數百人遷太
常丞兼五禮學士後爲尚書祠部郎陳亡入隋官至
秦王府主簿

姚最字士會博通經史尤好著述年十九隨僧垣入關
明帝盛聚學徒校書於麟德殿最預爲學士隋文帝
踐極除太子門大夫後襲爵北絳郡公及平陳察至
卽讓封於察轉蜀王秀府司馬秀陰有異謀最竟任
爲罪論者義之

沈客卿武康人美風采善談論博涉羣書與施文慶少
相親昵仕陳累遷至尚書儀曹郎聰明有辯頗知故
事每朝廷體式吉凶儀注凡所疑議客卿斟酌裁斷
事多施行然頗事刻削士庶並責關市之估每歲所
入過於常格後主大悅尋加散騎左衛將軍遂與文
慶俱掌機密臺城失守隋晉王以其重賦厚斂戮之
章華吳興人陳後主時同郡沈客卿等用事上書曰昔
高祖南平百粵北誅逆虜世祖東平吳會西破王琳
高宗克復淮南辟地千里三祖之功勤亦至矣陛下
卽位於今五年不思先帝之艱難不知天命之可畏
溺於嬖寵惑於酒色祠七廟而不出拜三妃而臨軒
老臣宿將棄之草莽詔佞殘邪升之朝廷今疆場日
蹙隋軍壓境陛下如不改絃易張臣見麋鹿復遊於

姑蘇書奏即日斬之

吳季德處士名馮菱湖人僧皎然有杼山禪居寄東谿
吳處士詩季德善詩詞故皎然所寄專以詩言

徐孝德長城人生女名惠五月能言四歲通論語八歲
屬文孝德命擬離騷爲小山篇曰仰幽巖而流盼撫
桂枝以凝想將干齡兮此遇荃何爲兮獨往於是所
論著遂傳太宗知之召爲才人遷充容永徽元年卒
贈賢妃後其妹爲高宗婕妤弟齊明明子堅堅子嶠
皆以文學名

楊衡吳興人有盜其文登第者衡因詣闕亦登第見其
人盛怒曰一一鶴聲飛上天在否答曰此句知兄最

惜不敢偷衡笑曰猶可恕也孟東野有悼楊衡詩云

沈千運吳興人元結篋中集云千運獨挺於流俗之中
強振於已溺之後窮老不惑五十餘年凡所爲文皆
與時異故朋友後生稍見師效能似類者有五六人
焉嗚呼自沈公及二三子皆以正直而無祿位皆以
忠信而久貧賤皆以仁讓而至喪亡異於是者顯榮
當世誰爲辯士吾欲問之

王季友張籍皆有過沈千運舊居詩

沈亞之字下賢學於韓退之與皇甫湜以文往來元和
七年以書不中第李賀有詩送之

杜牧之守吳興時過小敷山弔沈下賢一首

等集二
亞之登進士至太和初李同捷反乃授柏耆德棣行營諸軍計會使亞之以殿中侍御史爲其判官會李祐平德州同捷窮請降耆乃馳入滄誅同捷諸將嫉其功比奏攢詆之文宗不得已貶耆循州司戶參軍亞之貶南康尉張祐送亞之南康尉一首

嚴憚字子重烏程人皮日休傷之其詩序云子爲童在鄉校時簡上鈔杜舍人牧之集有與進士嚴憚詩後至吳一日有客曰嚴憚子志其名久矣遽懷文見造於是樂得禮而觀之其所爲工七字往往有清便柔媚時可逸駭於常軌生舉進士亦十餘計惜予方免之謂竟有得於時也未幾歸吳興後兩月雪人至云

生以疾亡於居矣噫生徒以文詞聞於士大夫竟不名而逝豈止此而堙沒耶於是哭而爲詩

詩見藝文類

閻士和烏程橫山人皎然有舟行懷寄詩一首道場山下有歸雲庵其得名蓋出此詩云二月湖南春草徧橫山渡口花如霰相思一日在孤舟空見歸雲兩三

片

梁耿茗谿人劉長卿有茗谿酬梁耿別後見寄二首長卿南謫睦州道出吳興與諸名士游衍故梁有別後見寄之作

施昌言吳興人寶元閒仕殿中侍御史嘗撰唐文粹後序

姚鉉吳興人集唐文粹一百卷其序充雅可讀蓋一代
文士

正光庭烏程人列太學博士嘗承縣令余蟾檄請編集
吳興遺事羅隱有酬光庭詩

施肩吾吳興人元和十五年進士後隱居豫章之西山
所居在歸安縣東施渚鎮

李季蘭吳中女冠也高仲武評其詩上仿班姬則不足
下比韓英則有餘不以遲暮亦一俊嫗
季蘭與諸賢會集烏程開元寺知劉長卿有陰重疾
戲之曰山氣日夕佳長卿對曰眾鳥欣有託舉坐大
笑以爲美談

宋時吳興狀元及第賈安宅莫儔黃朴三人吳潛雖狀
元及第自是溧水人第後始寓居吳興郡志妄載潛
而不及莫儔儔雖小人而此錄固不可遺也石林燕
語云及第必有賜詩惟莫儔一榜不賜政和末御史
李彥章言士大夫多作詩有害經術詔送敕局立法
何丞相執中爲提舉官遂定命官習詩賦杖一百故
是榜官家不賜詩而賜箴未幾知樞密院吳居厚喜
雪御筵進詩稱口號是後上聖作屢出土大夫亦不
復守禁或問何立法之意何無以對乃曰非謂今詩
乃舊科場詩耳

陸蒙老元光嘗爲晉陵宰頗喜作詩時州幕官有好讒

同列者一日同會聞蟬幕謂陸曰君可詠此陸卽席
詠曰綠陰深處汝行藏風露從來是稻糧莫倚高枝
縱煩響也宜回首顧螳螂其人聞之自是少戢
賈收字耘老有詩名東坡爲守與之遊耘老有二婢名
大小荷葉東坡時時戲之一日乘舟過賈浮暉閣收
不在見其子添丁留詩有云淚垢添丁面愁低舉案
娥娥指荷葉也坡去郡後有復東云貧固詩人之常
齒落日昏當是兩荷葉所困未可專咎詩也又坡東
勝達道云吳興風物足慰雅懷郡人有賈收耘老者
有行義極能詩公擇子厚皆禮異之軾尤與之熟願
公時顧慰其牢落也

賈安宅在鄉校肄業直廬後產雙頭蓮花守兵白教授
率諸生觀之折取諦玩葉閒隱隱有金書賈君姓名
諸人共致慶語勉之力學以來歲大魁相期輕薄子
笑曰賈癩子作狀元天下無士人也時正病瘡徧體
故云至秋獲薦送廷對爲第一

賈公之子名煥仕爲鄱陽丞

劉一止字行簡宣和三年進士仕給事中僅百日忤秦
檜罷去閒居十餘年以次對致仕檜死被召力辭進
雜學士卒年八十三著非有齋類稿五十卷茗谿集
三十卷

弟寧止亦中第立朝梗亮論疏凱切

沈復德清人壽皇朝爲板曹貳卿一日上問板曹財用
幾何合催者幾何所用幾何虧差幾何復一一奏對
訖於所佩夾袋中取小冊進呈無毫髮差上大喜次
日問宰相侍郎有過政府例否梁克家奏云陛下用
人何以例爲遂特除簽書樞密院事

倪文節公思立朝剛介不苟合嘗言與其爲有瑕執政
寧爲無瑕從官故慶元嘉定之間屢召屢出名重天
下

公與秀邸爲鄰頗爲侵越地界公曰住場好不如肚
腸好墳地好不如心地好眞良言也其薦楊萬里劄
子好賢愛國之心萬世可仰

公生六子祖仁祖義祖禮祖智祖信祖常祖常有最
良之譽

沈仲喆字明遠歸安人紹興五年進士仕江西運官嘗
作詩忤魏良臣陷以深文奪三官不得志以卒

章淵字伯深援之孫也博學有文以場屋待士薄如防
寇盜遂不就舉後用蔭入仕自號懲室子所居有箬
谿草堂

丁注字葆光元豐間余中榜進士善歌誦有閒雅氣象
所居清源門內家有二園一在所居一在奉勝門內
經鉏堂志載施大任參政年九十有二沈持要詹事年
八十有二李季叔參政年八十有一皆耳目聰明步

履輕捷夜書細字三賢難老皆以絕欲早效驗章章如是

俞汝尚歸安人仕至青州僉判與其妻素達理性汝尚病呼其妻曰我將死時二子在外妻曰吾欲先去君俟諸子至未晚也其妻奄然而化汝尚爲文誌其墓已而諸子至明日告曰我亦行矣卽熏沐跌坐而化孫莘老嘗表其墓子有任仕爲節推東坡有送節推詩

朱承逸爲湖州孔目官夜過駝橋聞橋下哭聲視之一人攜妻子欲共投水問之云負勢家錢三百千督責無以償耳朱卽護歸見債家悍僕羣坐朱諭之曰

以三百千錢使四人死於水於汝安乎吾當代還亟取券來如數還之其人感泣願爲奴不聽復以三百千資之而去

慶歷中知州事馬尋會六老於南園六老者侍郎郎簡年七十九司封員外郎范說年八十六衛尉寺丞張雄年九十一劉餘慶年九十二周守中年九十五貝琰年七十二胡安定先生爲記

談鑰吳興郡人仕宋樞密院編修官撰吳興志二十卷倪祖常字子武歸安人仕宋戶部郎中文節公第六子有學行

生業多所著述見葉水心序
施仕衡字德求嘗試中校官爲宣州簽幕仕竟不達
吳僧文捷戒律精至孫莘老爲守問呂吉甫如何時吉
甫在潤州持服捷曰只三年便在官家左右更有一
人白哲而肥一人美髯而長後三年吉甫果參大政
同列韓之華馮當世皆如其言
僧居簡號報本長老有知人異術慶歷中蘇舜欽除名
居姑蘇唐詢彥猷守湖州與蘇善蘇過訪之唐命居
簡相視簡乃設榻留之中夜登蘇榻若聽其息者蘇
覺疹其脈良久曰來得也曷更無他語他日蘇將行
又過問之曰若得一州縣官肯起否蘇大不意因不

復言明年起爲湖州長史不赴而卒
宋釋法瑤姓楊氏河東人永嘉中過江遇沈臺真請居
武康小山寺年過七十飯粟飲茶永明中敕吳興禮
致上京

僧贊寧讀書強記自能撰述而辭辯縱橫人莫能屈時
有安鴻漸者文辭雋敏尤好嘲詠嘗行遇贊寧數僧
相隨鴻漸嘲曰鄭都官不愛之徒時時作隊贊應聲
曰秦始皇未阬之輩往往成羣時皆善其捷蓋鄭谷
詩有愛僧不愛紫衣僧之句也
元字文公諒字子貞湖州人初領鄉貢入浙省試院頭
場占一席舍其案上有宇文同知四字後試官閱卷

以文不中式將黜之時坐主龍麟洲先生江西老儒也年八十餘始過江浙力主此卷卒置榜中及會試果登高第授同知婺源州雖曰爵祿前定蓋亦陰德所致公年少時嘗館授巨室其閨愛中夜來奔堅拒不納明旦託以他故歛書告別此非陰德歟出輟耕錄

趙孟頫字子昂以集賢學士家居見夫婦操敝舟爲活者公識其人惻然問曰我衣食爾夫婦供灑掃鷗波亭可乎夫婦欣然居之一日公緩步至亭問其居此若何夫婦感激以爲得所惟憂身後無歛形之具耳公曰我適行閒憶奎章閣一石甚奇命侍史取紙筆就亭圖之神速特甚俾鬻爲身後計持至駱駝橋好

事者以十千購之

松雪晚年家居名重四遠有稱雪菴居士書刺謁公公曰青蓮居士耶香山東坡耶不許見公一日送客不覺出門外見一人伏於地問之跼蹐不敢言但致願見之誠公曰爾非昨來雪菴居士者乎遂呼使入贊見之禮頗豐又出彬筆兩枚王右丞雪裏芭蕉一軸公遽言爾來欲吾題此畫耶濡筆題而歸之

子昂之內人管夫人能畫與詩嘗入覲中宮命寫梅稱旨命題之云雪後瓊枝嫩霜中玉蕊寒前村留不得移入月宮看

費寮仕元鎮國上將軍福建宣慰使謚榮敏公自吳興

別著籍松江之上海器度弘厚不以富貴驕人輕財
好施勇於爲義人稱爲費佛子有牟巘所撰墓誌在
華亭鳳皇山

國朝溫祥卿長興人耿炳文守長興與張士誠相拒以
祥卿爲謀主後官工部尙書墓在仁王山西北麓

王升字晉叔德清人其子名軫仕爲崇信縣令升寄書
云自舊年十一月初二日南潯別後至今年凡四得
書鎮江高郵寧陵鄭州者餘一書不知寄何人必浮
沈矣三月十一日汝兄會朵至剛於德清書中簡略
不知從者及同遊俱無恙否且言歲中可至任不知
果然乎本家德清之役已辦兩圖黃冊里長及歸安

甲首皆不擾而辦里長不赴京倉此甚良法也正擬
安靖幾時十二月間本縣又定新市弓兵分管十二
都但辦什物句提軍人至今不得安息所費亦不少
也家中上下俱無事儻或挈家須在彼稍安詳度可
否然後來取恐川途迢遞或遷轉不常跋涉勞頓今
我稀年又一老景侵尋儻
朝廷容侍親則上章求歸父子相見以盡餘年若宛
轉仕途則相見無日矣人說有分俸之例不審有否
如得分祿以養亦足爲榮若彼處關支則不必也凡
事清心潔己以廉自守食貧處儉儒者之常慎勿以
富貴爲念古人云貧乏不能存此是好消息正當以

此言爲受用也治民以仁慈爲心報國以忠勤爲本處已當以謙敬學業更須勉力暇日卽以性理之書及羣經留玩自然所思無邪更須熟讀新律自然守法不惑飲酒當以康節先生爲範不可縱恣忠定之事律許則行不可干其紀也此後儻有的便可買附子一二枚川椒一二斤起稅而來餘物非所覲也臨川奴世生俱無疾但諸子未出瘡疹爲憂耳浙西米價極廉白者半分一升可見太平之時矣雖有來者而往者絕不可得汝之外舅向曾寄書與蓋匡俞主簿祇候去若達希聲於十一月望後逝世餘外親俱安就令知之路遠作書不能詳盡

此書寄與御史臺句管宇文桂被

太祖皇帝搜出特詔獎資之仍令有司除本戶雜役
余詮安吉人

洪武十六年徵耆儒崇德鮑恂上海全思誠安吉余詮高郵張長年入見恂等年皆七十餘

上喜賜坐顧問者久之並命爲文華殿大學士輔導皇太子及皇太孫恂等固辭

上曰朕以卿等年高故授此職以輔導太子耳免卿早朝日晏而入不久當從其志庶不負卿等平生所學而鄉里亦有光矣卿何辭焉恂等復固辭翌日

賜敕放還

見皇明
赦運錄

倪文節公思嘉定初與金人講解使還中書議表賀又有以和戎為二府功欲遷秩者公曰澶淵之役捷而班師天子下詔罪己中書樞密待罪今屈己盟戎柰何反以為慶乃止

吳興掌故集卷之二

九靈山長徐獻忠輯
延州布衣吳夢陽閱
後學茅獻徵校

吳興掌故集卷之三

遊寓類

夫士有四方之志不為里巷之所羈繫者多矣或山川靈秀觸目寄懷而遂趨逸駕或朋儕契偶攬衣結睇遂相聯附或感亂傷時圖存裔孺或絕塵遠俗寄興幽貞非營獨往之業則存諧素之願固在在有之而吳興為尤著故以存其跡云

漢錢林字元茂建平中為諫議大夫後王莽專政來隱

於平望鄉陂門里梓山之東穿庵造村青山臨流子孫因家焉

今長興吉祥鄉有陂門里或古平望鄉也

吳羌因王莽亂攜妻子隨梅福東隱於吳後居烏程之餘不鄉人因名其所居山爲吳羌山云今其子孫散見者甚眾

沈戎初爲九江從事後徙居餘不鄉其後子孫之盛見於史傳者一百五十八人三十八人有正傳餘皆附見宋梁陳閒皇后三人尙主者五人仕宦之多至今爲吳興之冠

陳達漢太正長六世孫永嘉中爲長城令遂家焉陳霸

先其七世孫也

正俊漢平帝時持節安撫江南屬王莽篡位因留居烏程後其子正騰隨光武起義南陽累仕至大司馬卒葬於烏程

庾翼汲郡人仕晉爲蘭陵令奮節將軍隨元帝過江爲

吳興郡丞因居烏程翼生豫章太守鎮鎮生征虜司

馬建武將軍欽信欽信生宋晉熙王兵曹參軍黯黯

生南臺御史高高生齊驃騎大將軍孟眞孟眞生梁

散騎侍郎僧朗僧朗生陳給事中五兵尙書宗

晉何叡渡江居吳興生子楷字克準爲吳興太守曾孫

何子平見宋書

裴子野字幾原河東人少好學善屬文仕齊爲江夏王
行參軍以曾祖松之嘗令故鄣因家焉

陸羽字鴻漸復州人唐上元初隱居苕谿自稱桑苧翁

嗜茶著經三篇

詳見自序

張志和字子同婺州人唐肅宗慕其高尙命待詔翰林
後出爲南海尉遂放浪江湖與陸羽往還因託迹吳
興其兄松齡懼其不返也和其漁父詞云樂在風波
釣是閒草堂松徑已勝攀太湖水洞庭山狂風浪起
且須還又兄鶴齡恐其遁世爲築室越州東郭
所著玄真子及大易十五篇其卦三百六十五後憲
宗圖其像求之不可得李德裕稱志和隱而有名顯

而無事不窮不達嚴光之比

崔元亮磁州昭義人元和中爲吳興刺史因家於長興

縣西之崔灣

顧雲字垂象池州人風韻詳整與杜荀鶴殷文珪友善
同隸業九華咸通中登第爲高駢淮南從事師度之
亂退居雪川杜門著書後宰相杜■奏雲與盧知猷
陸希聲錢翊韓偓司空圖等分修宣懿僖三朝實錄
書成加虞部員外郎

陸龜蒙字魯望吳江人仕爲吳興郡丞因置茶園顧渚
山著吳興實錄笠澤叢書及松陵集有病臥田舍自
遣詩可知居湖之興味

宋蕭德藻字東夫三山人嘗宰烏程遂家焉所居在弁山有千巖競秀因自號千巖老人有千巖集行于世楊誠齋序曰近世詩人若范石湖之清新尤梁谿之平淡陸放翁之敷腴蕭千巖之工緻皆予所畏也姜夔字堯章番陽人少從父宦遊古沔女須因嫁焉千巖老人在沔與堯章相得遂攜過茗雪以兄之女妻之堯章遂家武康自號白石道人往來吳門與范石湖厚善詳見癸辛雜志

堯章長於聲律嘗著大樂議欲正廟樂慶元三年詔付奉常有司收掌并令太常寺與議大樂時嫉其能盡識其器有司遂以爲器尙不知安可議樂是以不

獲盡其所議人大惜之

牟子才字存叟井研人愛吳興山水因家焉自幼從學于魏鶴山嘉定閒除史館檢閱官對延英殿陳六事三策受知理宗嘗曰牟子才好箇士夫歷官至資政殿學士卒諡清惠所著存齋稿一百卷內外制十卷四朝史稿五卷奏議二十卷經筵講義五卷口義二卷故事三卷四書易編三十卷春秋輪輻稿未就卒子嚙仕至大理寺少卿有陵陽集嚙生應龍仕上元主簿以文章世其家有隆山集黃文獻公爲之序文及翁字時學緜州人徙居吳興仕宋資政殿學士景定閒言公田事有名朝野宋亡元世祖累徵不起閉

門著書有文集二十卷子志仁字心之常州路教授
高斯得字不妄邛州蒲江人宋紹定閒仕至端明殿學
士簽樞密院參知政事奉敕同提舉編修武經要略
寓居烏程之王村卒葬於九原鄉仙人頂其家有至
元八年朝奉郎守監察御史武信撰墓誌銘
葉達縉雲人仕吳越刑部侍郎夫人封永安郡太君羊
氏葬湖州之弁山遂爲烏程人六世孫夢得仕宋參
知政事夢得父名助字天祐爲睦州建德尉母晁氏
何彥猷字叔遠高唐人紹興中爲大理丞秦檜誣岳飛
下獄彥猷與李若樸論其無罪乃更屬附檜者所論
見黜寓居德清餘不谿上孝宗卽位遙贈二階特命

其子伯臨爲徽州文學

方淑字智善祥符人紹興初舉進士爲德清丞愛其谿
山之勝遂家焉以持論平正不附秦檜意旨罷
劉光祖字德修蜀人紹興閒爲殿中侍御史極論朋黨
僞學之禁言甚剴切寧宗初坐留朱熹罷起居郎主
管玉虛觀慶元三年言官論列放棄房州後復職歷
官顯謨閣學士以蜀地險遠寓居德清之新市市人
呼其家曰川劉

章援宋政和閒知湖州遂寓居長興其孫淵字伯深
吳潛溧水人登第後寓居德清之新市按溧水志云吳
柔勝淳熙八年進士仕至祕閣修撰生四子源泳淵

潛淵登嘉定七年進士潛後三年及第二公俱入溧水鄉賢祠今湖州志乃列潛爲長興人尤謬德清新志又併吳柔勝收入之秉筆疏妄一至此潛兄弟俱葬德清縣北之張家山

周密字公謹歷下人其祖少傅公卽僑居郡城天聖寺側至公謹卽寘業弁山號弁陽老人所著有齊東野語及癸辛雜志等書

孟宗政其先隨州人後徙居歸安南渡後功業大著見宋史

子琪仕至荆湖置制大使詳見宋史
琪生縉仕至尙書縉生濬字君復以蔭歷官至太守

贈吳興郡公有衡湖集濬子道夫官至府判

程公許字秀與眉山人徙居烏程歷官至刑部尙書謚文簡詳見宋史

陳振字文舉杞縣人宋南渡居錢唐父益中爲餘杭簿振讀書實踐年二十以詩經舉爲蘇州文學掾元末避兵弁山家焉

子胤爲古田教諭胤子敏政中進士官至南康知府蔡洸字子平仙遊人乃端明之後也徙居雪川以父蔭補將仕郎中甲科除大理評事遷寺丞出知鎮江府方勺嚴瀨人慕張志和高蹤乃於志和浮家泊宅之所買田築室自稱泊宅翁有泊宅編十卷

游似字景仁南充人孝宗朝進士淳祐五年入相致仕
傲居德清之新市鎮其家山至今猶存

貢師泰字泰甫宣城人泰定四年以國子生釋褐授泰
和州判官遷翰林應奉預修后妃功臣列傳遷宣文
閣授經郎拜監察御史至江浙行省參知政事召爲
祕書卿至海寧而卒先寓錢唐後移家烏程之三碑
鄉至今子孫爲烏程人

黃玠字伯成慈谿人清苦力學慕吳興山水因卜居卞
山下有弁山集及唐詩選纂韻錄子名野得爲湖學
訓導孫名定仕至布政使

敖繼翁字君善福州人寓居烏程築一小樓冬不鑪夏
不扇惟事經史吳下名士從之遊者甚眾元浙西平
章事高彥敬薦授信州教授有文集二十卷趙子昂
亦出其門

王簡字伯敬霑化縣人父吉昌任濟南府治中元統間
簡以材薦授祁陽縣尹後改尹烏程因家焉後遷福
寧州尹至正十二年劇賊王善寇建邵迫州境簡率
民力戰馬中流矢被執罵賊死節屍不仆亦無血惟
涌白沫而已次子相亦被擒遇害妻潘氏亦守節死
家奴逃還告其長子禎禎往收得父母屍歸葬烏程
江浙行省上其事贈奉議大夫濟南路總管上輕車
都尉太原郡侯以禎襲父爵除紹興路總管張士誠

陷城亦死於節

張羽字來儀潯陽人元季授安定書院山長因欲卜居吳興以詩約其友人徐賁曰吳興好山水子我盍遷居繞郭羣峰列迴波一鏡如蠶餘即宜稼樵罷亦堪漁結屋雲林下殘年共讀書於是定居於戴山東洪武初仕至太常寺丞兼置翰林院同掌文淵閣事詩文奇古尤善畫卒葬九里岡有湖學教授金華童冀墓銘郡志因其為潯陽人遂謫以為南潯土著甚謬徐賁字幼文蘇州人因張羽之約遂遷烏程之蜀山詩有北郭集以吳中所居在北郭故也方是高啟楊基與二君齊名時稱高楊張徐

鄭如幾字維心大末人徙居德清之龜谿從葉石林諸名公遊以陳壽三國志紀載無法乃作魏春秋仍以魏紹漢統張無垢九成與相善移書難之復書曰僕不能趨時媚世守所學至於窮且老因刊正三國之書以度餘日辱賜教疑其予操而黜備衰病居山無緣面究欲置不報恐閣下終疑不解敢申其說商系夏周系商秦系周漢系秦魏系漢晉系魏縣縣系而不絕者謂之統若以魏篡取黜不使系漢則統其絕矣春秋列國之君雖篡殺而取者皆得承其統聖人不沒其實所以著其罪也司馬遷作史記略準春秋至秦項呂氏亦皆列之本紀非予之也法應然也

胡仔字元任新安人待制舜陟之子遷居湖州自號茗谿漁隱所著有叢話一百卷
牛諒字士良東平人後居烏程
洪武初由秀才仕至禮部尙書
粹漢字宗海自永嘉徙居德清仕國子助教
孫一元字太初云關中人詩有骨氣且有道養修髯玉貌望之知其高人也與劉公麟施公侃交因居吳興而娶焉卒葬於道場山歸雲菴之東麓有劉公所撰墓碑
吳興掌故集卷之三

吳興掌故集卷之四

九靈山長徐獻忠輯
延州布衣吳夢暘閱
後學茅獻徵校

著述類

吳興自昔稱多賢士者不但樹其勳名以嘉王路而已精思覃於纂錄博雅見之記注視之他郡邑斯為盛焉姑撫所聞以章往跡諸郡邑吏留情圖記有關於土俗者併見

吳興郡疏一卷晉太守王韶之撰韶之在郡中有贈潘吳二孝廉詩宋四廂樂歌及諸樂府皆出其手蓋文

學士也

吳興錄一卷吳韋昭作

吳興入東記梁吳均作均居長興南六十里之青山在
吳興之西太守柳惲召補主簿始入東境始作入東
記以辨山川故實

吳興記山謙之作

三吳土地記顧長生作

吳興山墟名張玄之作見統記

吳興志陸羽作

吳興雜錄七卷唐湖州刺史張文規作載義興造茶及
風物雜占甚詳文規乃張薦之後顏魯公石罇聯句

薦兄弟與焉文規之父名彥遠

武康土地記唐福州侯官縣尉郡人沈常作

吳興地記顏真卿作凡山川陵墓古跡皆入記刻之石

柱故又名石柱記

吳興統記景德中攝湖州長史左文質纂共十五卷分
門別類故事頗詳

餘英志二卷慶元中鄉進士劉潼撰

吳興續圖經紹興中校官郡官同編

吳興志舊編淳熙中教授周世南同諸職分撰共十有

二卷

吳興志二十卷宋樞密院編修官郡人談鑰編今所傳

誌實皆祖之以其頗詳也
吳興續志

周易兩係

老子要略

莊子內篇訓注

沈麟士撰

周禮義三十卷儀禮義三十卷禮記義三十卷毛詩義
二十八卷喪禮經義二十五卷周禮音一卷毛詩音
十卷俱梁沈重撰重武康人仕至五經博士
晉書一百卷四聲韻二卷梁沈約撰比次漢魏以來最

為詳悉唐人取之以補晉記雖去遷固本意已遠稍
繁雜然亦不可少也

沈休文集十五卷別集十卷約之文集百卷今所存止
此

五經義一百卷陳沈不害撰

漢書訓纂三十卷說林十卷梁姚察撰

宋略二十卷齊裴子野撰

吳興實錄唐陸龜蒙撰

顧渚山記茶經三卷江表四姓譜十卷南北人物志十

卷源解三十卷占夢三卷陸羽撰

玄貞子外篇三卷玄貞子漁歌碑傳集錄陳氏曰玄貞

子漁歌止傳西塞山前一章而已嘗得其一時倡和
各五章及南卓柳宗元所賦因以顏魯公碑述唐書
本傳以至近世用其詞入樂府者集爲一編以備吳
興故事

施肩吾西山集肩吾吳興人元和十五年進士以豫章
之西山乃十二真羽化之所因卜隱焉且以名其集
自爲序

沈亞之集十卷詳見人物類

孟東野詩集十卷孟郊字東野貞元十二年進士調溧
陽尉辟爲興元參謀卒郊早隱嵩山性介寡合爲詩
理致而苦澀雖死葬北邙實武康人也

文府二十卷徐堅撰開元中詔張說括文選外文章乃
命堅與賀知章趙冬曦分門討會堅乃先集詩賦二
類爲文府上之

初學記二十卷開元間命諸學士各撰一集於是徐堅
撰初學記歐陽詢撰藝文類聚虞世南撰北堂書鈔
皇輿二十卷南宮故事一百卷齊丘仲孚撰

說林十卷梁姚察撰

西聘記玉璽記建康三鍾記姚察撰

漢書訓纂三十卷說林十卷姚察撰

江左文章錄五靈鞠著序起太興訖元熙

江左文章別集錄五淵之著

錢起詩集三十卷起仕至考功郎中

杼山詩式僧清晝字皎然撰

物類相感志十卷僧贊寧采經籍傳記物類相感者志之分天地人物四門柳如京徐騎省與之遊

皎然詩文集十卷皎然湖州謝氏子有逸才與顏魯公于頔諸郡公交惟陸羽至清談終日恥以文章名嘗歎曰使有宣尼之博識胥臣之多聞終日目前矜道侈義適足以擾其性豈若松巖雲月禪坐相偶無言而道合志靜而性同吾將入杼山矣于是束所著詩文火之後中丞李洪刺湖州枉駕杼山請及詩文晝曰貧道投筆硯二十餘年一無所得冥搜物類徒起

我人今棄之久矣洪搜之人間僅得十卷後相國于頔序之進於朝德宗詔藏祕閣後人稱曰晝之晝能清秀

吳興詩一卷知湖州孫莘老撰

茗谿漁隱叢話百卷宋胡仔仲任著茗谿漁隱其自號也取古人詩考之傳記爲叢話卽唐詩紀事之類也癸辛雜志宋周密字公謹號弁陽老人著

夢谿筆談二十六卷宋沈括著括博學通方技仕至鄜延經略使退歸林下屏迹交遊思繹舊聞作此

志媿集石林葉夢得自名其奏議爲志媿集序曰進對以來奏藁藏千家者若干篇不忍盡棄乃序以爲十

卷夫天下豈無大安危生民豈無大休戚矧戎狄亂
華中原分裂上方櫛風沐雨旰食圖功而身遭不世
之遇橫被非常之知所言僅如是而已心非木石安
得不媿姑自識之留遺子孫庶後世悼其意之不終
或有感動奮發慨然少能著見者猶足泄其無功之
恥而償其未報之恩也

石林家訓一卷石林燕語十卷石林過庭錄二十七卷
俱夢得撰其中子模編輯

玉礪雜書十卷玉礪者石林山居礪名也流從弁山圓
證寺東所居在焉所記俱宣和時事

石林避暑錄巖下放言石林建康集十卷石林審是集

八卷石林詩話二卷石林書傳二十卷論語擇言十
卷俱葉夢得撰中興藝文傳多采入惟審是集爲門
人盛光祖子紹所錄

齊齋甲藁二十卷乙稿十五卷翰林前後稿四十卷掖
垣詞草二十卷兼山論著三十卷附錄五經年譜一
卷齊齋奏議三十卷掖垣繳論四卷銀臺章奏五卷
臺諫論二卷昆命元龜說一卷經鉏堂雜志十卷班
馬異同三十五卷俱禮部尙書歸安倪文節公名思
字正甫號齊齋所撰公受知阜陵早登禁直紹興間
遂位法從立朝有風采天下重之端平初詔以先朝
遺直追謚文節

遷史刪改古書異辭十二卷倪正父以遷史多易經語
更簡嚴爲一異體當然也然易辭而失其義書辭而
與經異者多不可以無考故爲是編經之外與他書
異者亦并載正父倪文節公言行錄遺奏誌狀碑銘諡議一卷戶部郎中
倪祖常字子武輯其先公遺事魏了翁撰碑銘
吳興分類詩集三十卷倪祖義子由編益以孫莘老所
集太略而增廣之然亦病於太詳祖義齊齋之子少
俊該洽仕未達年五十而死
綺川集十五卷太常主簿倪偁字文舉撰乃齊齋之父
也

易說二十卷倪淵撰

張子野集一百卷張先字子野仕爲都官郎中郡志稱
其晚年漁釣自適至今稱張釣魚灣死葬弁山多寶
寺後李公擇守郡作六客堂子野與焉古今詩話曰
客有謂子野曰人皆謂公爲張三中卽心中事眼中
淚意中人也公曰何不目爲張三影蓋其詩有雲破
月來花弄影浮萍斷處見山影隔牆送過鞦韆影故
云
沈子壽文集葉水心序曰吳興沈子壽少入太學名聞
四方仕四十餘年絀於王官再入郡三佐帥幕公私
憔悴而子壽老矣然其平生業嗜文字若性命在身

非外物也甲乙自著累百千首嗚呼何其勤且多也
余後學也不足以識子壽之文其爲音瑰富精切自
然新美使讀之者如設芳醴珍肴足飲厭食而無醉
飽之失也又能融釋眾疑兼趨空寂又不惟醉飽而
已又當消愠忘憂心舒意閒而自有以爲有得於斯
文也觀其開闔疾徐之間旁觀而橫陳逸鶩而高翔
蓋宗廟朝廷之文非自娛於幽遠淡薄者也

竹齋詞沈瀛字子壽撰

禹山集沈仲喆字明遠撰丞相該之姪紹興五年進士
同菴集施士衡字德求撰
克齋詞沈端節字約之撰

若谿奏議長城劉珏字希范撰嘗以同知樞密院扈從

隆祐南幸

白石道人歌曲五卷姜夔字堯章撰

泊宅編十卷方勺撰

萍洲可談三卷朱彧撰

稿簡贅筆二卷承議郎章淵伯深撰章援之後也其人
博學有文以場屋待士太薄不就舉

丁永州集三卷知永州丁注葆光撰元豐中余中榜進
士喜爲歌詞

龜谿集十二卷知樞密院沈忠敏公與求撰嘗奏王安
石之罪大者在於取楊雄馮道當時學者惟知有安

石喪亂之際甘心從僞無仗節死義之風實安石倡之此論前人所未及也

非有齋類藁五十卷詞一卷給事中劉一止撰

千巖擇藁七卷外編三卷續編四卷知陝州三山蕭德

藻撰

見南山集五十卷祕閣修撰劉燾字無言作

長樂集十四卷福建提刑俞尙撰

春秋類事始末朝請大夫章冲字茂深撰子厚之曾孫

葉少蘊之婿

復古編二卷吳興道士張有謙中撰有自幼喜小篆年六十成此書三千言據古說文以為證其點畫之微

轉側縱橫高下曲直豪髮有差則形聲頓異自陽冰

前後名人格以古文往往而失其精且博如此其辨

魏國夫人墓道魏字從山與巍字同乃出於魏伯陽

參同契自序文乃說文所無也其序藏魏伯陽三字

曰委時去害依託正山循游寥廓與鬼為鄰此藏魏字上從

山字

法書撮要十卷蔡嵩山父撰以書家事實分門條類漳

熙中

兩漢蒙求十卷樞密劉珪撰

避戎夜話石茂良太初紹興初虜人南侵所記遷轉時

艱而已

典刑錄十二卷吳宏編凡二門

楚國圖經二卷淳熙十二年吳莘商卿撰

觀文集折桂集璧水集玉堂漫藁元宇文公諒撰

葉清臣集一百二十卷清臣烏程人天聖中仕至侍讀

學士知河陽

劉宜翁文集三十卷奏議四十卷劉誼字宜翁長興人

其子即劉燾

傳言古鑑五十篇宋長興劉度撰

劉汝一進卷三十卷諫大夫劉度字汝一科場業也

易小傳六卷宋沈該字守約撰其說以左氏變卦為文

進之高宗降詔褒獎別著文集五十卷

注東坡詩四十二卷年譜目錄各一卷司諫施元之字

德初與吳郡顧景蕃共為之元之子宿推廣為年譜

陸放翁序

唐文粹一百卷宋姚鉉集

松雪集元趙孟頫撰

白蘋集四卷宋文林郎單父龐謙孺祐甫撰嘗客居吳

興故作是集以白蘋名

紹興春秋傳建炎二年六月戊辰江端友請下湖州取

崔子方所著春秋傳藏之祕書經解十二卷例要一

卷紹興六年八月子方之孫岩止之

柳軒退稿十卷元程郁著仕至知州歸植五柳於庭扁

日柳軒烏程人
味外味稿元唐棣字子華撰趙文敏公之弟子以詩畫

名家

茶山稿十二卷長興沈貞著

愚齋集武康沈顛著宋濂序

弁山集元黃玠著

花谿集至正中沈夢麟著先任武康尹以儒術緣飾吏

治後居歸安

韋軒集洪武中烏程陳援著

陵陽集牟嘯撰

隆山集牟應龍撰黃文獻公為序

存齋稿一百卷四朝史稿五卷四書易編三十卷牟子

才著

齊東野語宋周密字公謹著

謝氏蘭玉集十卷吳興汪聞序集謝安而子孫歷宋

齊梁陳凡十有六人詩三百四十餘篇謝氏子遷葬

安石之墓在長興九鴟岡其後遂居之

衡湖集孟漳著

北郭集徐賁著

靜居集張羽著

箬谿集長興華質義字伯直著

翠微集華廉字仲清著質義之子

臨清集德清人車昭字叔明著

釋氏稽古錄吳僧覺岸字寶洲編集寶洲世居烏程之職里姓吳生於至元丙戌甫七歲父喪母章氏拊育之口授以論語曲禮年十三捨之本郡天寧寺投普覺獨孤朋禪師剃髮受具普覺藏多典籍寶洲熟讀玩味采集爲書至大己酉掌靜慈書記延祐初遂自知藏分座說法於天寧至治壬戌行化於嘉禾泰和甲子住松江佺山垂三十年其書自伏羲至南宋紀年甚詳而佛氏降跡傳派如指諸掌

楞嚴經集解十卷湖州靜覺法師仁岳撰翰林侍讀學士知制誥胡宿序之曰室中千鏡多光互入堂下六

樂正聲相宣鼓吹妙經藻火圓教法施豈有涯哉英宗治平元年三月二十四日入寂全身葬於何山

吳興掌故集卷之四

Blank page with vertical lines.

吳興掌故集卷之五

九靈山長徐獻忠輯

大夫... 延州布衣吳夢暘閱

刻... 後學茅獻徵校

金石刻類

吳興名郡金石刻視他郡為多新志悉無所錄名賢
莫之迹所藉以不磨滅者在此而肆然去之必有所見
而予獨慨然惜之矣墨妙亭之刻近亦少行於外其
所存亡俱未可知然其名不容以不存也其諸縣邑
悉攷識附見

墨妙亭碑熙寧五年孫莘老守郡作亭於府第之北道

遙堂之東取凡境內自漢以來古文遺刻以實之見

蘇子瞻記

僧智永集羲之書作聖教序記容以不存也其精熟且漢故梁相費府君碑矣墨妙亭之設設亦少行然亦其漢故堂邑令費君碑十盾誅辭而舉然去之必有祖且漢堂邑令費鳳別碑甘陵石勛撰隸志悉無祖錄各寶此三碑名三費碑其鄉因以名之

陳孝義寺碑散騎常侍御史中丞徐陵撰唐銀青光祿

大夫湖州刺史上柱國十代孫嶠之書

舞綃堂記齊慶胄撰

射堂記顏魯公書

項王碑陰述顏魯公書

項王蔬食文正除述

千祿字書魯公書

石柱碑魯公書記

晉吳興太守謝公碑唐刺史裴清撰僧道銑書

太守歷官記自王逸少洎陳任忠凡四十四人唐人所

勒在晉太守謝公碑陰

白蘋洲五亭記白居易撰知州事馬纘書

白蘋亭記

湖州刺史廳壁記顧況撰

袁高茶山述湖州刺史于頔撰

沈府君墓銘君諱縉字章甫乾元元年京兆韋卓撰并書

胡夫人墓銘天復三年京兆於景休撰并書

金氏墓銘太中十二年鄉貢進士李翊述并書

吳氏墓銘太和九年胡季良書

斷碑二咸通五年于僧翰書一乾元元年鄔彫書

羊欣宋翼二帖

褚令摸蘭亭帖俱撫刻在亭後移入沈存中家

秦篆繹山記慶麻戊子摹刻參知政事宋庠跋

寶章法帖一部元祐中劉燾被旨摹刻

梁太守柳惲江南曲至和二年刻寇準亦有江南曲附

張逸碧瀾詩

陳堯佐芳菲園詩

蘇東坡六客詞

東坡墨妙亭記蔣燦書

陳吏部修城記陳之茂撰

晉謝太傅塘碑先在謝公鄉後移入亭

杜繁長興雜詠子希為郡守刻于亭

葛清孝公仙潭雜詠

宋高宗草韻承議郎權發遣湖州軍州兼管內勸農事

借紫陳汶題其後

已上諸刻俱藏墨妙亭

雜刻郡城

曹士冕法帖譜系云烏鎮張氏以閣絳二帖鋟木家塾或遇良工摹拓亦有可觀後板歸新市人家每連紙一幅可打一段予在三山見一本於向氏叔堅之裔偶缺兩卷且以元祐閒所拓戲魚堂帖足之此刻字畫稍肥而極有筆意頗勝諸帖惜其閒錯誤數字為可恨耳趙宰叔愚云丙戌歲在宗庠有以法帖板質於齋舍族人偶不記為何人疑是此板

唐令狐楚詩高閒書石本在湖

見待訪錄

朱晦翁有乞承帖云欲觀造化之理今藏湖之道場山瑤阜帖郡丞趙蘭坡所刻其別業名瑤阜故以名之

蘭亭刻宋理宗集成一百十七本禿成十冊內乙集有安吉古苔真草本丙集內古雪斷石本辛集內有劉無言臨本癸集內有趙菊坡本此四本皆吳興今存其名以見

敕天下放生池碑唐肅宗御書題額銀青光祿大夫使持節昇州諸州軍事昇州刺史充浙西節度使兼江寧軍使柱國丹陽縣開國侯顏真卿撰并書刻在魯公祠

乞御書題額恩敕批答碑陰記顏真卿書

唐開元封文宣王詔大厯四年別駕孫沛立石右軍遠宋孫王榮書在州學

宋太宗詔立戒石碑黃庭堅書在知州大廳前

宋真宗玄聖文宣王贊在州學

真宗製文臣七條武臣七條并詔知湖州軍州兼管內

勸農事馬尋建刻在州廳

仁宗獎諭守臣滕宗諒進柑子詩敕書立石在州學

徽宗御書手詔在州廳

徽宗辟雍手詔并大司成辟昂奉旨撰後序崇寧四年

通判林虞立石在州學

御書八行入刑手詔在天聖寺

高宗御書孝經紹興十四年太守張宇立石在州學

孝宗御書獎諭守臣鄭作肅在郡廳

封崇孔宣父故事刺史辛祕記在州學

德本寺碑在文廟碑陰胡季良撰

文宣王新廟碑在州學唐大中年祕書郎鄭言撰并書

按刺史令狐綯作廟本末記云西臨霅水前橫狄塘

梁塹爲橋編木爲柵卽甘棠橋文宣王廟也

湖州刺史題名記唐廣德元年補闕內供奉李紆撰又

貞元十六年華陽顧況撰後記又貞元十七年刺史

李詞撰後題又宋康定元年知州滕宗諒撰後題

白蘋洲記刺史孫儲撰進士王溥書刻在州廳壁

修河漚記直學士程文昌撰待制沈樞書在州廳壁

湖州紀功碑太常寺奉禮郎時元佐撰蓋紀刺史辛祕

平賊臣李錡之黨也
吳文皇帝廟碑唐中安定胡季良撰在廟中
大寧寺建功德碑武康令姚章撰前衢州龍正尉徐浩
書在報恩光孝寺
湖州州學記慶厯中張方平撰蔡襄書在州學
條架閣樓記元祐七 years 左承議郎簽書節度判官廳公
事朱振撰刻在樓下
宣德軍節度判官廳壁記天聖八年大理司直節度判
官張旻撰
吳興倅廳題名記嘉祐六年祕書省祕書通判軍州章
衡撰

銷暑樓記元祐五年呂升卿撰并書在樓南
浮玉亭記天聖四年鄭戢撰安吉尹希古書刻在亭中
迎春橋記通判軍州胥偃撰在駱駝橋
儀鳳橋記天聖二年鄭戢撰
廳梁題字記元祐二年林希題在郡治
修造倉庫橋梁記徐仲謀撰
會景樓記治平二年徐仲謀撰
書記廳集虛堂記校書郎陳師錫撰
重修開元觀碑
吳興靈鶴贊白居易撰知州事鄭建序在天慶觀
三住銘施肩吾撰在天慶觀

廣化寺華嚴一分塔銘知州事胡宿撰

廣化寺瑞閣記葉夢得撰

顏魯公祠堂記知州事張田撰

郭尚書郎廟記唐知州事鄭建撰

曹王廟記

靈濟王廟記

通靈王廟記

項王廟記

石曼卿經史閣三字在州學

湖學田記顧臨撰

重建學田記朱臨撰

重繪三禮圖記劉一止撰

湖州路總管郝侯祠記

米元章魯公碑陰記

魯公懷忠堂祠記程舍人撰

魯公堂三詩王十朋撰

趙直閣祠堂記乾道中种口撰在魯公堂

東坡先生祠堂記淳熙八年蕭德藻撰在魯公堂

西亭記顏魯公撰

湖州錄事參軍新廳記唐楊夔撰

安定書院燕居堂碑元李朮魯翀撰

玄妙觀玉皇殿記

烏程雜刻

梁簡文帝吳興卞山楚王神廟碑

浪跡先生玄真子張志和碑顏真卿撰

杼山妙喜寺碑顏真卿

唐進士龔韜墓誌在卞山南杜牧之

烏程縣修建廨宇記楊夔

烏程縣修東亭記楊夔

唐大光大師神異碑先在法華寺後重刻於縣治相國

李紳撰

唐大光和尚道蹟碑陳文在撰

唐丞相李紳墓碑在裏山

唐吳興王氏墓碑在雪水鄉

唐古山索靖廟碑

吳越回文綬帶連環詩碑在法華寺節度使錢惟治作

道場山十聖殿碑太平興國三年知湖州錢信記

瑞現禪院大聖碑祠部員外郎鄭湛記在喜宥院

西餘山弄雪亭碑在大覺寺知州胡宿記

牟先生墓誌銘虞集記

何山定化院碑朱臨記

卞山龍王廟碑朱臨記

何氏讀書堂碑在何山寺汪藻記

葛仙翁祠堂碑在普照院葛立方記

真武畫像碑在佑聖宮丞相沈該贊

安定胡先生墓表歐陽修

張常勝墓誌銘在鳳凰山王安石

烏程縣新建儒學記程邵

烏程令韋公德政碑在縣治唐至德二年沈務本撰沈

仲昌書

歸安雜刻

唐重置興國寺碑在無為寺

唐永興寺僧伽和尚碑在鹿苑寺裴述撰

唐永興寺冥道記在鹿苑寺沙門簡章述

永興寺縣令戴公生祠記進士張先

唐東林土地廟記

南園記園在定安門內煥章閣學士洪邁

文昌宮碑

歸安縣新建學記鄧文原

回仙祠堂記劉一止

長興縣雜刻

陳周弘正奉敕製報德寺碑在大雄寺

陳徐陵撰報德寺塔銘在大雄寺子院

唐沙門靈皎城山寺碑在慈氏院

唐沙門清晝魚陂明禪師塔銘在空隱院

宋縣令新廳事碑

縣令許祕丞長興利便事碑

修謝太傅廟碑治平四年縣令吳濤作

修謝太傅墓田碑

長興進士題名記劉燾

東岳行宮記元湖州總管孟濤作趙孟頫書

東湖書院修造田記楊維禎

安吉州雜刻

唐施明侯碑

唐李衛公上西岳廟書重刻碑本在廟

輔世忠烈王廟記宋沈樞撰

東禪寺記宋魯伯能

重修放生池記縣令胡浚明

安吉太守趙公雙節碑

德清縣雜刻

梁沈氏述祖德碑在金鵝山沈麟士撰

沈氏述祖德碑陰記顏真卿撰

唐李諒靈泉記

重修縣宇記宋鄭如幾撰并書

羅漢禪院記僧贊寧撰

重修孔子廟碑沈與求撰鄭如幾書

法鑒講師塔銘在覺海寺

縱雲臺記宋劉一止撰

寧海軍節度掌書記沈嚴墓誌銘范仲淹撰

趙知縣生祠記在乾元寺

重建縣治記王禕撰

武康雜刻

唐大慈寺鐘記縣令韓章撰

吳越大安寺佛殿記


吳越風山靈德王廟記

宋重建縣學記蕭德藻撰

敕賜淵應廟碑建中靖國年建毛滂撰

呂東萊讀書堂記謝夢生撰

吳興掌故集卷之五



等集五

